

## MINGGNI KU·MONGGRIKANIRANG

*Sabbath Attam-August 26*

**Ia Antini Lessonna Poraiani:** *Gal. 4:21–31; A·ba. 1:28; 2:2, 3; 3:15; 15:1–6; Re·o. 6:2–8; 19:3–6.*

**Mingani Pod:** “Indiba kosakoni Jerusalem jakgitel ong·a, ua an·chingni ma·a ong·a” (*Galatirangna 4:26*).

**K**ristianrang jerangan Niam Gitcamni bil gnanganiko jegala uamangara Sinaio on·gipa niamko nama kattana ku·cholsan ong·gijagiparang ong·a. Uamang indake agane bon·atea: Sinaio on·gipa ku·monggrikania mandeni ma·kringia niamko maniesa jokataniko man·ani ong·achim. Indiba manderangni niamko manina chu·sokgijani a·selo, Isol uamangna gital ku·monggrikaniko on·aha, aro uan Jisu Kristoni namanichi ka·saani ku·monggrikaniko ong·a. Ian uamangni ia minggnini ku·monggrikaniko uiani: niam gitcamara niamo pangchaka, aro niam gitalara ka·saanio pangchaka.

Iako indake agananiara, ong·ja. Jokatananiara mamungsaloba niamko manianio ong·ja; a·bachengaonin toromara ka·saaniosa ong·a. Paulni nikanio, Galatio niamko kingkot manigiparanga orto chongmotko sretatengachim. Ia minggni ku·monggrikaniranga somoini kri ong·ja; indiba manderanga maiko gisiko chanchia uko ong·katatanisa ong·aia. Uamang Isolko talatna gita minggni dingtanggrikgipa ramarangko mesoka, ua ramara Kain aro Abelona re·angpiltaiiani ong·a. Niam Gitcamora Kain gita antangtangni skao Isolko namnikatna dakaniko mesoka, indiba gitalo ku·monggrikanianara Abel gita, jean pilakko dakaon Isolni ka·saanio chu·gimikan pangchakani ong·a.

*\*Ia antini lessonko name poraie ia Sabbath September 2 na taribo.*

**Robibar**

**August 27**

## **KU·MONGGRIKANINI JA·PANGRANG**

Bang·an Paulni Galati 4:21-31 o Israelrangni gimin pe·e agananiko uni chitirangni gisepe u·ina namen man·dikbatsranggipa ong·a ine chanchia. Ian Niam Gitchamni manderang aro ua somoirango mairang ong·aha uarangni gimin namedake apale u·ichenganiko uina nanganiko uigijani gimin ong·a. Skanggipa ja·kuara, jeni giminan Paul jeraa raaniko daka ua Niam gitchamni ja·pang ja·dilni gimin name uianiko nanga: aro uan ku·monggrikani miksonganiko u·ina nangani ong·a.

Ibri katta *beritko* “ku·monggrikani” ine pe·a. Ian Niam Gitchamo chang ritchagittammang nakata aro ian ku·monggrikaniko, soi ka·grikaniko, aro namgrikaniko dakaniko mesokani chin ong·a. Hajal bilsirangnan, ku·monggrikaniranga Near East-o manderangni jatrang baksa nangrim-meligrikaniko dakanio mongsonggipa jakkalronggipa ong·aha. Ku·monggrikaniko dakanio matburingrangko so·otna nanganiba gnan. Matburingko so·otaniranga, badiaba dol ku·monggrikaniko pe·ahaode una mai ong·gen uko mesokani chin ong·a. “Adamoni Jisuona, Piokgipani re·baenganiko miksonge Isol mandeni ma·kringko mingsani ja·mano mingsa ku·monggrikanirangko, Daudna ku·monggrikao matchotate kam ka·aha (A·ba. 12:2, 3; 2 Sam. 7:12–17; Isa. 11). Israelna, Babylono rim·gittangako man·mitingo Isol nambatgipa ‘gital ku·monggrikani’ko (Jer. 31:31–34) Daudoni Messiah (*Jokatgipa*) re·baenganiko miksonge ku·rachakaha (Ezek. 36:26–28; 37:22–28).”—Hans K. LaRondelle, *Our Creator Redeemer* (Berrien Springs, Mich.: Andrews University Press, 2005), p. 4.

**Pap sokbana skang Isolni Adamna Eden bario *original* ku-monggrikania maio ja-pang-ja-dil (*base*) ong-achim? A·ba. 1:28; 2:2, 3, 15–17.**

Bia ka·ani, bil jakchi kam ka·ani, aro Sabbathko on·ani, iarangan ong·atani somoio ku-monggrikao mandena on·anirang ong-achim. Iano mongsonggipa Isolni ge·etania beng·gimin bolni biteko cha·jachina ong-achim. Ia kumonggrikanio mongsonggipa miksonganide “katta manibo aro tangbo” ine ong-achim. Uano Isol an·tangni namnikanirang gita pilakkon ong·atahae, uano Jihova mandeko dakna amgijaniko dakatna nangnikanian grichim. Mandeni uno dakna nanganide katta maniani; indioba, Adam aro Hoba jekon dakna nangjachim uko basee ra·aha. Aro uko dakanian, ong·atania ku-monggrikanikosan pe·aijaha; indiba mandeni dakna amsokgijaniko gita dakgipakoba ong·ataha. Isol Antangan Adam aro Hobani gimaatgimin nangrimgrikaniko ra·bataina kam ka·na nangaha. Ua iako Jokatgipani jringjrotna ku·rachakanio pangchake, ka·saani ku-monggrikani niamko daktaie on·aha (*A·ba. 3:15*).

**A·ba. 3:15 ko, Sastroo skanggipa nama kattani ku·rachaniko poraibo. Ua podni badia bako an·chingni Kristoo ka·dongna man·ani chinko na·a nika?**

*Sombar*

*August 28*

**ABRAHAMNI KU·MONGGRIKANI**

**A·bachenga 12:1-5 o mai ku-monggrikani ku·rachakanirangko Isolara Abrahamna dakaha? Abrahamni aganchakania maikai ong·a?**

Isolni Abrahamna skanggipa ku·rachakanirangara Niam

Gitchamo bilakbegipa kattarangko ong·ata. Ia podrangara gimikan Isolni ka·saanirangni gimin ong·a. Abraham ong·ja, indiba Isolsa ua ku·rachakanirangko dakaha. Abram Isolni namnikataniko man·na mamungkoba dakjaha, ba Isol aro Abram maiba agan·chanchigrikaniko ia dolgnini namnikaniko dakna gita damsan maikoba kam ka·aha ine mesokaniba dongja. Isolsa pilak ku·rachakanirangko dakaha. Abramkora, Isolni ku·rachakanirango ka·dongchake bebera·anikosan am·aiachim, maiba alamala “bebera·aniko” ong·ja indiba bebera·ani jean uni ka·sagipa ma·drang bakdrangko uni bilsisotsnibonga ong·ahao wate Isolni ku·rachakgipa a·songona re·mikkanganganikosa am·achim.

“Abrahamo patina aro uchi pilak mandena patiskana ku·rachakananichi, Ong·atgipa Uni piokna miksonganiko gital dakattaiaha. Ua Adam aro Hobana An·senggipa biap (*Paradise*)o patiaha (A·ba. 1:28, 5:2) aro unikode “Noa aro uni dedrangrangnaba’ Chi Dubiani ja·mano patiaha (9:1). Indake Isolara Uni skango mandeko piokna, namgijako nisina, aro An·senggipa biapko on·piltaina ku·rachakaniko rongtale mesokaha (A·ba. 3:15). Isol a·gilsak gimiko ‘pilak manderangna’ Uni patina ku·rachakaniko tik ong·aha.”—Hans K. LaRondelle, *Our Creator Redeemer*, pp. 22, 23.

**Ku·rachakgimin depante atchina bilsis 10na sengani ja·mano, mai sing·anirangko Abramara Isolo Uni ku·rachakanirangni gimin sing·aha? A·ba. 15:1–6.**

Abramni jajrenggija sing·anirangko sing·gija bebera·ani gimin gaora dake agannade altuabea. Indiba Sastroo maibakai dingtang dake mesokskaa. Abram bebera·aha, indiba uaba jolgimikan sing·anirang gnanng. Uni bebera·ania bilakrorogipa bebera·ani ong·achim. Mark 9:24 o pagipa gita, Abramba Isolo A·ba 15:8 o sing·a, Angko bebera·na dakchakbo. Aganchakao,

Isol Un baksa ku-monggrikanio napanichi, Uni ku-rachakani ong-chongmotgniko Abramna ka-dongataniko on·a (*A·ba. 15:7–18*). Maia iano aiao inmanata uara Isolni Abharam baksa ku-monggrikanio napani gimin ong·ja indiba Isolni uko chonbatgiparangona dakangkuna skanisa ong·a. Near East-o chengoni gipin sason ka·giparang gita dakgija, uamangni nokkolrang gita ku-rachakanirangko dakate, Uni kattamangmangko Isol on·aijaha, indiba, bang·a matburingrangko so·otatachi chinko on·e, Ua Uni janggiko kengnio donaha. Beben, Jisu bon·kamaode Uni janggiko Skobikroko Uni ku-rachakaniko chongmotgipa ong·atna on·aha.

**Nang·ni ong·na amjasusu nikipako bebera·achi sokena nanggipa mitam biapranga da·o bano? Je a·sel ong·oba, uko rim·e dongna na·a maikai skie ra·na man·gen?**

*Mongolbar*

*August 29*

**ABRAHAM, SARA ARO HAGAR**

**Mainasa Paulara Hagarna ong·a obostani gimina dongtogijani ong·a? *Gal. 4:21–31, A·ba. 16. Ia Niam Gitchamni golpoko aganachi, jokatani gimin, mai bilonggipa miksonganiko Paulara dakenga?***

A·bachenga ki·tapo an·ching Hagarni golpoko nika, aro ian Abramni Isolni ku-rachakanio bebera·a chu·onggijaniko nikna man·a. Abramni noko Egyptni me·chik Hagar nokkol ong·e dongengachim. Hagar Abrahamni gam ong·baaha, aro ian Pharaoni Abrahamna Saraini bodol bang·a on·anirangko on·anio man·chapbaaha gita nika. Hagarko jikgite ra·e depanteko man·na kam ka·aniara Abramni Isolni ku-rachakanio skanggipa bebera·a chu·onggijaniko mesoka (*A·ba. 12:11–16*).

Ku-rachakgimin depante atchina bilsu chikkung sengani

ja-manoba Abram aro Sarai degri ong-kuengachim. Uamangni dakchakaniko Isolara nangenga ine chanchie, Sarai Hagarko Abramna jikgite on-aha. Chengoni dakbewalrangde, nokkol me-chikara an-tangni nokgipa banji ong-enggipa *misstressna* bodol ka-ako man-gipa ma-gipa (*surrogate mother*) dake dangdike on-na nangachim. Indake, Saraiara uni segipana Hagarko on-aha, aro uoni deko man-ode uko Hagarni de chanjawa; indiba an-tangni de inen changenchim. Indake jensalo depanteko man-bebeaha, uara Isolni ku-rachakgipa depantede ong-jachim.

Ia golpoo an-chingna bilakbegipa mesokani donga. Abram dal-gipa aro bilakbegipa mande ong-a; indioba jajrenganirang duulon Isolo bebera-aoni tang-onna man-a. A-ba. 17:18, 19, o Ishmaelko uni man-rikgipa ong-china Abraham Isolo molmolaniko dakaha; indiba Gitel uko jegalaha. Ishmaelni atchiao aiao inmananide Sarani an-tang seko gipin me-chikna sualna man-anisan ong-aia! Ia me-chikna ramramarigipa bi-sa atchiano, uno mamung aiao inmanani dongja. Abraham, Isolni una ku-rachakanio ka-donge dongaikugenchimode indakgipa dukrang uona re-bajawachim aro bang-a obostarangkon gelna man-gnokchim.

**Ishmaelni atchiaoniko, Isaakni atchiaonimung obostarangko tosusaatbo. *Aba. 17:15–19; 18:10–13; Ibri. 11:11, 12.* Mainasa ia obostarangara Abraham aro Sarani bebera-aniko inditan nangaha?**

**Isolni ku-rachakanirango nang-ni bebera-a chu-ongjani gimin nang-na mairangchi saknaanirango ra-baaha? Ia gualaragoniko je a-sel ong-oba Isolni kattako ra-na gita, na-a maikai skie ra-na man-gen? Isolni ku-rachakanirango nang-ni bebera-niko bilakatna man-na gita mai basee ra-aniko na-a dakna man-gen?**

**HAGAR ARO SINAI A·BRI** (*Gal. 4:21–31*)

**Maidakgipa ku·monggrikani nangrimgrikaniko Isolara Uni manderang baksa Sinaio dakna skachim? Isolni Abrahamna ku·rachakgipaoni mai apsananggiparang uo gnang?** *Re·o. 6:2–8, 19:3–6, Deut. 32:10–12.*

Abrahamna on·gipa apsan ku·monggrikani nangrimgrikaniko Isolara Israelni dedrangnaba Sinaio on·na skaha. Chongmot, A·bachenga 12:1–3 o Isolni Abrahamna kattarangko on·ao aro Re·o 19 o Uni Mosen a on·gipa kattarango apsananganirang donga. Ia minggni obostarongon, Isol Ua Uni manderangna maiko dakgen uni gimin raken agana. Uni patianirangko man·na gita Ua Israelrangko mamungkoba ku·rachakatja; indiba uamangni patianirangko man·anina uamangara katta manie dongna nangachim. Ibri kusiko “bamna” ko Re·o 19:5 pe·gipara “knatimna” ine ong·a, chongmotan, “knachakna ba katta manina.” Uni ku·rachakanirangna Abrahamni aganchakani dakgipakosa ua Israelonikoba bebera·aniko nanga.

**Isolni Israelna ku·monggrikani nangrimgrikaniko Sinaio on·gipa Abrahamna on·gipa gita apsanangode, indide mainasa Paulara Sinai a·brio on·gipakora Hagarni obostaoni dingtange ra·skaa?** *Re·o. 19:7–25; Ibri. 8:6, 7.*

Sinaio ku·monggrikani on·ania mandeni pap bang·beako Isolni bang·bea ka·saanichi namatpiltaijaniko mesokna ong·achim. Sinaio ku·monggrikani chu·sokgija ong·ahanide Isolni baked ong·jachim indiba manderangni ku·rachakanio chu·sokjahani giminsa ong·a (*Ibri. 8:6*). Isolni ku·rachakanirangna sontole aro bebera·e aganchaknai pal,

Israelrangara an·tangtango ka·dongchakesa aganchakaha. “Jihovani agangimin pilakkon chinga dakgen” (*Re-o. 19:8*). Bilsi 400 na bate Egipto nokkol ong·e dongani ja·mano, Isolni aiao inmananiko aroba an·tangtangni papibeani giminba uamang u·ijaha. Apsan daken Abraham aro Saraba Isolko Uni ku·rachaknirangko chu·sokatna ine dakchakna joton ka·aha, Israelrangara Isolni ka·saani ku·monggrikaniko kamrangchi chu·sokatna joton ka·skaaha.

Sinaio on·gipa niam namja aro uni gimin uko nisigalaha ine Paul aganjaenga. Galatirangni niamo kingkot dakani giminsa kenchake ua agana. “Niamko rakie Isolko kusi ong·atna amchongmotgijaniko uamang uina man·jaha. Indiba, an·tangtangni kamo pangchake Isolko kusi ong·atani niamsa uamango ningtuen cha·sipaha. Indake niamara uamangna ka·saani miksonganina nangejaha. Batesa uamangara Kristooni ekatako man·aha.”—O. Palmer Robertson, *The Christ of the Covenants* (Phillipsburg, N.J.: Presbyterian and Reformed Publishing Co., 1980), p. 181.

***Bristibar***

***August 31***

## **ISHMAEL ARO ISHAK DA·ALO**

Paulni Israelni itihasi gimin kan·dike talataniara uko warachakgiparango jera raana (*argue ka·na*) uni tarianian ong·achim. Uamangara antangtangkode Abrahamni de·ritchurang ong·a aro Jerusalem jean Jihudi Kristian aro niamni gimin *centre* ong·a uara uamangni ma·a ong·a ine kange ra·achim. Gipin Jatrande depatchirangsa ong·a; uamang Kristoni kakketgipa ja·rikgiparang ong·na skode, skanggipa uamang bigil rasotani niamko ja·rike Abrahamni depante ong·chengna nanggen ine uamang agana.

Bebede, Paul agana, iani bikpilgipasa ong·a. Ia niamko kingkot dakgiparanga Abrahamni depanterang ong·ja indiba



depatchirangsa, jedake Ishmael gita. Uamang bigil rasotaniko dake, uo ka-donge, uamangara 'be-eno' ka-dongenga jedake Sara Hagar baksa dakaha aro Israelrang Isolni niamo Sinaio dakaha gita. Gipin Jatni bebera-giparang, maibakaiba, Abrahamni depanterang ong-a indiba Ishak gita asol ong-ja, indiba ong-ronggijasa. "Ishak gita uamangara Abrahamna ku-rachakaniko chu-sokatako man-giminrang ong-achim . . . ; Ishak gita, uamangni jakgitelona atchianiara salgini ka-saani bite ong-achim; Ishak gita, uamangara ku-monggrikani ku-rachakani ritingo ong-achim."—James D. G. Dunn, *The Epistle to the Galatians* (London: Hendrickson Publishers, 1993), p. 256.

**Abrahamni chongmotgipa deritchurang ia a-gilsako mairangko chagronggen?** *Gal. 4:28–31, A-ba. 21:8–12.*

Ku-rachakgimin bi-sa ong-ani gimin Ishakna patianikosan ra-baaijaha indiba ra-chakgijani aro duk aro a-rik sanalanirangkoba ra-baaha. A-rik sanalani gimin aganaon, Paul A-bachenga 21:8-10 o maniani gimin gisiko donga, jeon Ishakko mandera-beenga indiba Ishmael uko jongkaie-ka-dingesa roskaenga. A-ba 21:9 o Ibri kattaode uko ka-dinga inen ina, indiba Sarani gisiko uara Ishmaelde Ishakko ka-dinge roengasa ong-ahachim. Ian man-rikgnini gimin gisik ning-o ning-tue bobil ong-grikenganiko mesoka. Chengo bang-a sason ka-giparangan susagiparangko, ba-rimarangkomangba ra-gale, an-tangtangni biapko naljoke donna joton ka-aha (*Bichal Ka-gipa 9:1–6*). Ishak ra-chakgijaniko man-omangba, uaba pilak ka-saani, naljokaniko on-ani, aro pagipaoniko man-rikgniko man-gnini giminde nama cholrangko man-engachim.

Ishakni deritchu su-ritchurang ong-e, jensalo an-ching nokoba mondolioba ong-ja maina, ra-chakgijani aro neng-nikanirangko man-on, an-chingara aiao inmanna nangja.

Mairangchi na·ara nang·ni bebera·ani gimin mongsongbate nang·ni sepangbatsranggiparangchi a·rik·sanalanirango saknaaha? Ba na·a an·tango ia rakgipa sing·aniko sing·bo: na·ara gipinrangni bebera·anina uamangko duk on·ana doso ong·genma? Iani gimin chanchibo.

*Sukrobar*

*September 1*

**CHANCHIDAPANI:**Read Ellen G. White, “The Law and the Covenants,” pp. 363–373, in *Patriarchs and Prophets*.

“Indiba Abrahamna ku·monggrikanio piokanini gimin unon ku·rachakani dongahaode, indide mainasa minggipin ku·monggrikaniko Sinaio daktaina nangaha? Uamangni nokkol ong·ao uamangara Isolni aro Abraham baksa ku·monggrikanio niamrangni gimin u·iani gimasrangaha. . . .

“Isol uamangko Sinaiona rimbaaha; Ua Uni rasongko mesokaha; Ua Uni niamko uamangna on·aha, Uni nangnikani gita katta manigiparang ong·ode bang·bea patianirangkoba on·na ku·rachakaha: ‘na·simang angni ku·rangko manichongmotode, aro angni niamko rakiode, indide na·simang pilak jatna bate angnin man·kamani ong·gen . . . aro na·simang angna kamalrangni songnok aro rongtalgipa jat ong·gen.’ Re·o. 19:5, 6. Ua manderangara antangtang ka·tongrangni papibeanirangko u·ijaha, aro Kristo gri uamangara Isolni niamko rakina angijani ong·a; aro joljol uamang Isol baksa ku·monggrikaniona napaha . . . . Indioba adita antirangsan batangaikua – unon uamang Isol baksa ku·monggrikaniko pe·aha, aro jakchi dakgimin bimangko olakina tubamaha. Isolni ku·monggrikimino uamang ka·dongna man·jaha; aro da·o, an·tangtangni paprangko aro uko kema ka·aniko nanganiko nike, uamang jokatgipako nanganiko uiaha. On·anirangko on·e, bolirangko on·e Abraham baksa ku·monggrikaniko dakanikoba

uamang uiaha. Da-o bebera-achi aro ka-saachi uamangara Isolona kaako man-aha, aro uamangni papni nokkol ong-aoniko Isolsa jokatgipa ong-aniko uiaha. Da-ode uamangara gital ku-monggrikano patianirangko man-na ra-chakna kusi ong-giparang ong-na tariaha.”—Ellen G. White, *Patriarchs and Prophets*, pp. 371, 372.

## CHANCHIGRIKNA SING-ANIRANG:

1. Nangni Isol baksa re-ruraniara “gitcham ku-monggrikani”oma ba “gital ku-monggrikani” o ong-bata? Dingtanggrikaniko na-ara maikai agangen?

2. Nangni mondolio mitam golmalrang jean bebera-rimskarangchin kenani aro jajrenganirangko ong-atenga uaranga mairang? Uarangko maikai namatenga? Na-a an-tangan saknaatgiparangni jako ga-akengoara, maikai na-a an-tangko saknaatgipa ong-jaenga ine tik uina man-gen? (*Mati 18:15–17 ko nibo.*)

3. Badita changna na-ara Gitelo iako ba uako dakjawa ine ku-rachakanirangko dakaha? Maikai ia dukni obostaranga nang-ko ka-saani ortoko uiatna dakchakaha?

**Agangopani:** Hagarni, Ishmaelni, aro Sinaio Israelni dedrangrangni golporangara Isol jeko ku-rachakaha uko chu-sokatna antangtangni joton ka-anio pangchakaniara gokani kamrangsa ine mesoka. Ia an-tangtangko toromi ong-e nikanikon gitcham ku-monggrikani ine agana. Gital ku-monggrikaniara jringjrotna ka-saani ku-monggrikani ong-a, uko papni ja-mano skanggipa Adam aro Hoba baksa dakaha, Abraham baksa gital dakattaiaha, aro bon-chotaode Kristoo chu-sokataha.

**PRINGO KATCHAANI—BAK 2**

Un attamo pamong aro uni jikgipa Marymaang nokchi re·angaha, indiba Mary noko ong·jachim. Uni segipa, Samy, nokni a·palo saksan asongengachim. Ua uamangna, ua aro Mary un attamo tangka (*dongja*)ni gimin dakgrikahaniko aganaha. Samy ong·a obosta gimikko aganaha—aro uamang antangtango so·ote sina mangsongengahachim.

Uamang ale cha·aniko man·na mondolini giljachi re·aha indiba uamang mamung Isolni donganiko nikjaha ine Samy agane on·aha. Ua mondolina rongtalgiparangni bimang (*statues*) rangko dakaha, indiba da·o mamungkoba uamang nangdapjajok, indale ua kamkon man·jaengjok.

Pamong aro uni jikgipa gisiko nangbeen knatimaha. Ka·sine indiba taraken uamang Samyna uamangni antangtango so·ote siania chol ong·ja ine, indakjachina didiaha. Uamang Samyko Isolo ka·dongchina, Una cholko on·e nichina aganaha. Samy namen dongsiksakako man·aha, ua mamung nambata cholko nikjaha. Ua, ua pamong aro uni jikgipao mai ka·dongani gnang uko uie nina skaha. Samyna Isolni ka·saaniko Sastrooniko mesoke, uamang konta gittamna agangrikaha. Samy Isolni aro Uni ka·saani gimin bang·a sing·anirango sing·aha. Unikode pamong Samy aro Maryna bi·aniko dakaha, mongsongbate Samy kamko man·china gita. Jensalo iamang jiksesa re·na chakataha, Samy uamangko pringgipino re·bapiltaichina molmolaha.

Pastor pring gipino re·angtaion, unode Maryara degipa baksa dongachim. Samy ku·sik apalbee ka·dingsmitengachim. Ua un pringo saksa *contractorni* re·bae uko kam ka·na aganeahako neng·esa pastorna aganna sengsoengachim! Mary indita antirangni gisepo da·osa ka·dingsmite nikjok. Sabbatho

pamongko grongaoni, uamang da·o chu·gimik dingtanggipa jiksesa ong·aha.

Changgipino pamong re·ange nietaiaha, Mary uko kusi ong·been rimchaksoaha. “Danielni be·en ding·a dongjajok! Aro uni gusuaba komijok.” Bang·gija salrangni gisepon ua namgipa bi·sa gitan kal·grike cha·anirangko cha·aha.

Madesh, pamong aro uni jikgipa uamangni nokdangko re·ange nierongkuaha. Uamang uamango namen dal·bea dingtanganiko nikchrakpilaha. Ia nokdang, dakgriksimsimaigipa aro so·ote sichina ka·mikkenatjringaigiparagara, da·o bi·engjok aro Sastroko damsani poraiengjok. Pamong iamang jiksesa baksa porairimeaniko dakahaon, uamang noksulrangkoba re·bae knatimechina okamatrongaha. Basakobade sak 25 rang Sastro poraianiko dakna sengsopila.

Jagittamni ja·mano Mary aro Samy napbolaha. Uamang uamangni ripengrangkoba re·bachina okamataha, aro adita jarangni ja·mano sakdok ripengrang napboldapaha. Ua jiksesa namen katchabejok maina ua kakketgipa Adventistrang bi·antalan, Samy pangnaba kam gri ong·jaha. Antiprakon iamang jiksesa gong 100 tangkarangko (*tithe aro mitelani on·anirangko*) Isolna Uni patianiranga ra·barongaha.

*Samy (Arockyasamy) aro Mary Arokya, iamangara India a·songni Trichy mondolio bimchipgipa memberang ong·enga.*